

TARIKH : 16 DISEMBER 2022  
AKHBAR : BERITA HARIAN  
MUKA SURAT : 12

## Ubah penggunaan bahan api fosil, elak impak iklim

# Ubah penggunaan bahan api fosil, elak impak iklim

- Desak kerajaan baru mempercepatkan laksana Strategi Pembangunan Tenaga Pelepasan Rendah Jangka Panjang

- Syarikat bahan api fosil perlu henti fenomena pencucian hijau dan bergerak secara jujur dengan komitmen untuk peralihan kepada karbon neutraliti sekarang juga



Pengarah Eksekutif Pusat Kesihatan Planet Sunway, Sunway University

Oleh Dr Jemilah Mahmood  
bhrencana@bh.com.my

Saya amat terkilan melihat betapa cepatnya berita semasa bertukar arah. Baru tiga minggu berlalu sejak lebih 30,000 peserta menghadiri Persidangan Perubahan Iklim PBB 2022 (COP27) di Mesir untuk mencari penyelesaian krisis iklim tetapi dalam sekelip mata, ia tenggelam ekoran 'persaingan' kitaran media untuk liputan mesyuarat negara Kumpulan 20 (G20) di Bali, persidangan ASEAN, pembebasan Kherson di Ukraine dan Kempen Pilihan Raya Umum Ke-15 (PRU15).

Tidak dilupakan paparan media sosial menyuar maklumat hiburan, keremah harian rakan (dan kucing mereka) serta pelbagai lagi gangguan perhatian disediakan khusus oleh algoritmanya.

Walaupun berita COP27 kelihatan seolah-olah lapuk, kita tidak boleh lupa beberapa kata putus penting antara pemimpin negara sudah dicapai. Oleh itu, adalah wajar untuk kita memperhalusi keputusan berkenaan serta mempertimbangkan impaknya kepada kita kelak.

Dari sudut positifnya, selepas beberapa tahun berdebat, akhirnya persetujuan dicapai untuk mewujudkan 'Dana Kerugian dan Kerosakan' merujuk kepada kos ditanggung akibat fenomena cuaca melampau atau impak krisis iklim seperti kenaikan paras laut.

Perbincangan penubuhan dana ini diadakan sejak bermulanya persidangan COP di Berlin pada 1995. Akhirnya, persetujuan untuk penubuhan dana ini didorong kehadiran negara terjejas langsung oleh krisis iklim seperti Pakistan mengalami banjir dahsyat hanya dua bulan lalu.

Walaupun kemajuan dicapai, masih tiada persetujuan mengenai takrifan istilah kerugian dan kerosakan ekoran potensi takrifan terlalu meluas serta sukar dinilai. Ini kerana ia boleh merangkumi kerosakan infrastruktur atau harta benda serta habitat semula jadi atau aset budaya.

### Perkembangan makin terbantu

Perkara ini, di samping janji tidak dipenuhi daripada COP terdahulu menyebabkan perkembangan sedia ada makin terbantu, walhal ia seharusnya dipertingkatkan lagi. Ini termasuk komitmen negara maju menyediakan peruntukan (yang kini seharusnya mencecah berbilion dolar) kepada negara membangun dalam persediaan menghadapi dan mengurangkan risiko impak perubahan iklim ke atas negara mereka.

Perkembangan negatif lain membabitkan penghapusan bahasa dan ayat berkaitan pemansuhan penggunaan bahan api fosil secara berperingkat daripada dokumen COP27. Sebaliknya, ia diganti perkataan baharu seperti menyeru pembangunan sistem 'tenaga pelepasan rendah dengan lebih pesat'. Dalam kata lain, ini hanya akan menggalakkan pembangunan perusahaan gas asli (sebenarnya membelakangkan lagi usaha melawan krisis iklim), bukannya tenaga jana semula.

Antara justifikasi perubahan bahasa dan ayat ini disebabkan ketidhadapan sumber tenaga untuk memenuhi keperluan sedia ada di negara maju yang

sebahagian besarnya disebabkan serangan Russia ke atas Ukraine.

Walaupun kelihatan seolah-olah kompromi ini untuk memastikan kesejahteraan negara mendapatkan sumber tenaga, namun kita perlu faham bahawa terdapat ramai wakil industri bahan api fosil (termasuk syarikat dari Malaysia) di COP27.

Pada pandangan saya, tidak dapat dinafikan kehadiran mereka di COP27 mempengaruhi bahasa dan ayat digunakan dalam dokumen berkenaan serta keputusan dicapai.

Apa-apa pun, tidak ada gunanya kita menyalahkan COP27 sebagai punca tindakan global yang lemah dalam menghadapi krisis iklim. Ini kerana punca utama cabaran masa kini adalah keberagantungan kita sendiri terhadap bahan api fosil. Realitinya, kegagalan persidangan seperti COP27 untuk mencapai penyelesaian adalah kegagalan kita semua.

Soalnya, apakah hala tuju wajar diteroka? Sebagai rakyat Malaysia dan warga global, kita tidak boleh menunggu atau bergantung kepada proses global untuk menentukan tindakan perlu diambil.

### Komitmen lindungi alam

Sebaliknya, sebagai khilifah di dunia ini, kita sudah memberi komitmen untuk menjaga dan melindungi flora dan fauna termasuk iklim kita. Oleh itu, kini, sebagai satu negara, kita perlu menunjukkan kita boleh memenuhi komitmen ini.

Kita perlu mendesak kerajaan baru mempercepatkan pelaksanaan Strategi Pembangunan Tenaga Pelepasan Rendah Jangka Panjang dan Perdana Menteri harus mengangkat strategi ini ke peringkat lebih tinggi. Saya yakin kita boleh melakukannya dengan lebih cepat dan baik lagi dengan pembentukan Kementerian Sumber Asli, Alam Sekitar dan Perubahan Iklim - satu perubahan yang sangat diperlukan.

Kita menyeru syarikat bahan api fosil (syarikat minyak, pengeluar plastik, sektor peruncitan dan lain-lain) menghentikan fenomena pencucian hijau dan bergerak secara jujur dengan komitmen untuk peralihan kepada karbon neutraliti sekarang juga. Alternatifnya, perkara ini diwajibkan ke atas syari-

kat secara undang-undang.

Kita perlu lantang bersuara dan menekankan bahan fosil perlu kekal seadanya di bawah tanah. Syarikat dengan keberagantungan tinggi kepada bahan api fosil mesti mempercepatkan transformasi inovasi tenaga alternatif.

Kita perlu bekerjasama dengan rakan senegara dan antarabangsa untuk mempercepatkan transformasi kepada net zero (sifar kosong) dan melakukan yang terbaik secara kolektif untuk mengekalkan purata kenaikan suhu kepada 1.5 darjah.

Kita perlu mengangkat suara tenggelam dalam rundingan - komuniti orang asli, kanak-kanak dan bella, orang kurang upaya (OKU) dan warga emas. Kita mesti mendesak untuk memastikan mereka diberi kepentingan dalam proses ini.

Kita memerlukan sektor swasta untuk bekerjasama lebih rapat dengan kerajaan negeri dan Persekutuan untuk membangunkan bersama penyelesaian berasaskan alam semula jadi untuk membiayai pemulihan sinki karbon kita.

Kita juga perlu memaikan peranan individu dan juga kolektif. Tidak dinafikan kita mempunyai keperluan jangka pendek untuk dipenuhi - makanan di atas meja, persekolahan anak-anak dan bil perlu dibayar.

Namun, kita juga perlu melihat ke atas, untuk menyaksikan apa yang berlaku di luar realiti kita dan memaikan peranan untuk meringankan beban impak dengan cara kita menjalani kehidupan kita.

Kegagalan COP27 harus menjadi teladan sudah tiada masa lagi untuk dibazirkan. Kita perlu menjadi contoh terbaik dalam perubahan dikehendaki ini. Kita adalah pengguna segala produk dihasilkan menggunakan bahan api fosil. Oleh itu, kita perlulah mengubah cara hidup dan memaksa pembekal barangan serta perkhidmatan untuk mengubah cara mereka.

Tiada tongkat ajaib dalam usaha. Kita perlu faham kesihatan semua amat berkaitan dengan kesihatan planet ini. Namun, jika kita tidak berubah sekarang, keesokan harinya tiada lagi. Seperti yang pernah saya sampaikan sebelum ini - kita tidak ada Planet B.

